

曾南丰全集

一
函十二册

南豐先生元豐類藁卷第六

翁律詩

七十首

郊祀慶成

并進狀

右臣伏以皇帝陛下嗣位之初郊見上帝聖意重慎齋
潔謹嚴始就帷宮則獨先群臣宵興待事及至壇場則
陟降陞級徹去裊藉至於薦獻之際則又端立以須不
肯即安退就便次所以至誠兢兢如此故得天地祖宗
眷顧臨饗華夷蠻貊觀聽欣喜惟初積陰久而未解及
輅車旣駕則天宇湛然日光明潤可謂能得使之主祭
而百神享之福合於天且不違之聖宜有歌頌被於聲

律臣與在館閣以文字爲職不敢以菲薄自止謹作五
言郊祀慶成詩一首凡一百二十字干冒宸嚴臣無任
惶恐激切屏營之至謹隨狀上進以聞
即祚謳歌後欽柴禮數新盛容超曠代樂貢盡殊隣宿
戒臨行殿宵興絕衆臣立須空便次步進却柔姻外物
雖多品天心在一純高靈終享德羣望亦依仁暗藹如
無間遲延若可親欲知精意答預覩太和臻積愷沉遙
甸浮陽上綺闥霽雲生斐亶愛景駐逡巡厚慶歸清廟
餘釐及兆人還宮動前蹕喜氣入韶鈞

仁宗皇帝挽詞三首

納諫終無悟知人久更明恩波通四海壽域載羣生異
俗衣裳會諸儒雅頌聲威靈空想象盛德詎能名
日轉歸人外天移入畫中冕旒餘澤在驚蹕舊儀空卜
宅三川繞方喪萬里通初寒石門路松檜颺悲風
滄海難回日青雲如送春服喪三月徧過樂四夷均感
格英靈在褒揚大號新依然社稷計王業付真人

英宗皇帝挽詞二首

已應南陽氣猶遲代邸來範鎔歸獨化綱理付群材禹
會方無外虞巡遂不回空驚栢城仗簫鼓送餘哀

繼文猶旦暮歸啓已謳吟画手傳英氣書筠見德音鑄

銅餘故鼎啄草付春禽試望橋山路蕭蕭翠栢深

慈聖光獻皇太后挽詞二首

并進狀

右臣伏以大行皇太后在位四十有七年身處宮闈聰明慈恕恭儉之德見於天下洽於衆論在仁宗時有輔佐相成之道在先帝及陛下之日非特始終孝愛兩義俱隆實有援立鎮撫之大功在先帝之世從權當國既而還政以時明識獨見出處應理自二帝三代秦漢以來母后功德未有巍巍如此奄盡大期羣情痛怛陛下執喪哀慕外雖易月內盡至性報復大恩誠禮備極蓋從古所未聞今山陵有日臣愚淺薄無以自効謹撰成

大行皇太后挽詞二首繕寫上進臣無任悲哀感咽之
至謹具狀奏聞謹狀

祖烈鷹揚終食冀家聲泉湧舊興譙人倫風化歸三世
王室功勞屬兩朝長信深嚴餘羽衛閼宮崇大列宗祧
衣冠籍籍談遺事不盡鴻名對永昭

山河德履孚潛顯江漢仁風被邇遐已輔乾坤成化育
終符日月繼光華和熹未寤還威柄明德猶疎抑外家
欲次徽音難髣髴空餘流恨入哀笳

送英州蘇秘丞

遠民歌舞戴昇平碧閣朱樓照眼明鄉饌雨餘收白葦

客罇秋後對紅英
瀧鳴真水遙通海
路入南山不隔城
材術如君有餘暇
出遊應數擁雙旌

送陳郎中還京兼過九江新宅

鷁舟金碧照溪沙
帆上風吹五兩斜
罷郡紫泥催向闕
過江紅旆引還家
因將舊社人携酒
應喜新林樹見花
莫作山齋久留意
中臺虛位有清華

遣興

安州十首

青燈鬪鼠窺寒硯
落月啼烏送迴笳
江漢置身貧作客
溪山合眼夢還家
百憂忽忽丹心破
萬事悠悠兩鬢華
誰與建帆先度鳥
更無留滯向天涯

楚澤

楚澤荒涼白露

一作霧

根盈虛無處問乾坤蟲蟲旱氣連年

有寂寂遺人幾戶存盜賊恐多從此始經綸空健與誰
論諸公日議雲臺上忍使憂民獨至尊

西亭

團扇頻揮到此亭他鄉愁坐思冥冥空羞避俗無高節
轉覺逢人惡獨醒歲月淹留隨日老乾坤狼狽幾時寧
欲知事事今何似萬里波濤一點萍

盆池

環環清泚旱猶深炳炳芙蓉近可尋蒼壁巧藏天影入

翠奩微帶蘚痕侵能供水石三秋興不負江湖萬里心
照影獨憐身老去日添華髮已盈簪

羈遊

麕飯寒虀且自如欲將吾道付樵漁羈遊事事情懷惡
貧病年年故舊疎自古幸容元亮醉凡今誰喜子雲書
何由得洗塵埃盡恣買滄洲結草廬

南軒竹

密竹娟娟數十莖旱天蕭洒有高情風吹已送煩心醒
雨洗還供遠眼清新筍巧穿苔石去碎陰微破粉牆生
應須萬物冰霜後來看琅玕色轉明

浮雲樓和趙嘏

萬里聊供遠眼開
簷前不盡水聲哀
朝雲尚拂陽臺去
羽獵曾圍夢澤來
解帶欲留長日坐
傾壺難飲故人杯
遭窮萬里飄萍內
到此登臨更幾回

照影亭

河流縈檻色輝輝
無數幽禽入鏡飛
已映渚花紅四出
更涵沙柳翠相圍
不欺毫髮公雖有
太盡妍媸道恐非
自笑病容隨步見
未衰華髮滿緇衣

晚望

蠻荆人事幾推移
舊國興亡欲問誰
鄭袖風流今已盡

屈原辭賦世空悲
深山大澤成千古
莫雨朝雲又一時
落日西樓憑檻久
閑愁唯有此心知

書閣

自憐埜性生來拙
誰許交情晚最親
世路因仍憂檻穽
他鄉衰暮傍風塵
惟將菽藿還求志
未有絲毫可爲人
一畝蕭然須輟得
欲偷閑日長精神

贈彈琴者

至音淡薄誰曾賞
古意飄零自可憐
不似秦箏能合意
滿堂傾耳十三絃

寄孫正之

貌癯心苦氣飄飄長餓空林不可招能舉丘山惟筆力
可磨雲日是風標詩篇綴緝應千首學術窺尋豈一朝
耳冷高談經歲遠江南春動雪還消

秋日感事示介甫

秋日氣已盛陰蟲朝暮聲烟雲斷溪樹風雨入山城沙
磧有遺虜旌旗多遠行生民苦未息吾黨耻論兵

簡翁都官

倦遊公府曳長裾笑上扁舟指舊廬自有文章真杞梓
不須雕琢是璠璣浮蛆滿瓮嘗春酒垂露臨窗理素書
況得君賓同壯節一鄉清問更誰知

陳祁秀才園亭

眼無塵土境殊清一繞芳蹊病體輕
煙樹疑從古畫見水軒真在碧天行
君能極巧安山勢我欲忘歸聽竹聲
只恐主人難住此弟兄嘉行滿鄉評

上杜相公

水爲舟楫旱爲霖社稷生民注意深
豈謂便辭黃閣議翩然求就紫芝吟
始終好古儒林士進退憂時國老心
只有聲名隨日遠不令功被管絃音

胡太傅挽詞二首

謹言留簡冊恭德載閨門
福履三朝盛官儀一品尊九

原無復起萬事付誰論不必諸儒記清名久自存
遠路參基命雄文入典章轎車俄就路瑞節始還鄉象
物陳虛寢哀歌寄奠觴惟應九原上松檜日蒼蒼

訓材叔江西道中作

枉渚荒源百里間草根經燒舊痕乾入陂埜水冬來淺
對樹諸峰雪後寒塢笛寂宜風外聽嶺梅初得醉中看
行尋故友心無事不覺西遊道路難

送雙漸之漢陽

楚國封疆最上流夾江分命兩諸侯何年南狩東櫓出
六月西來雪浪浮夏口樓臺供夕望秦川風物待春遊

可能頻度漁陽曲不負當年鸚鵡洲

孔明

稱吳稱魏已紛紛渭水西邊獨漢臣
平日將軍不三顧尋常田里帶經人

閑行

草軟沙勻埜路晴竹枝烏帽稱閑行
鳥啼綠樹穿花影風出青山送水聲
轉覺所憂非已事儘從多難見人情
閑中我樂人應笑忙處人爭我不爭

贈安禪懃上人

詎知蕭洒吾廬舊却有高明此寺隣
水竹迸生剛節老

秋山過抱翠嵐新惟憐季子歸來困自笑原思久更貧
深識幽人風義厚掃軒開榻最相親

贈護仁監院

人貧舉世今爲甚僧事新年始更多食糲衣穿雖擾擾
構虛基險自峩峩誅茅改築君初有繫馬長吟我暫過
但覺滿山金碧澗不知誰到爲烟蘿

送覺祖院明上人

冠石新牆日月回豐堂瓌殿起崔嵬鍾隨秋勢金聲壯
佛隱寒雲玉座開流水遠奔雙澗去平林高擁四山來
麒麟細草南東路一望松門意自哀

謁李白墓

世間遺草三千首
林下荒墳二百年
信矣輝光爭日月
依然精爽動山川
曾無近屬持門戶
空有鄉人拂几筵
顧我自慚才力薄
欲將何物弔前賢

送撫州錢郎中

名郎元是足風流
得郡東南地更優
翠幕管絃三市晚
畫堂煙雨五峯秋
黃柑巧綴星垂檻
香稻勻翻雪滿甌
應與謝公資健筆
邦人才薄詎能酬

送王汝使兩浙

使傳東馳下九天
此邦曾屈試鳴弦
仁聲又向新年入